

Na osnovu člana 68. Zakona o osnovnom i općem srednjem odgoju i obrazovanju ministar Kantonalnog ministarstva obrazovanja, nauke, kulture i sporta Unsko-sanskog kantona donosi

PRAVILNIK
o izvođenju ekskurzija u osnovnim i srednjim školama

Član 1.

Ovaj Pravilnik regulira način organiziranja i izvođenja ekskurzija u predškolskim ustanovama, osnovnim i srednjim školama (o daljem tekstu škola), ističe njihov cilj, obavezu učestvovanja učenika, raspored, vrste i dužinu trajanja, organizaciju i tok, utvrđivanja organa nadzora i analizu izvedenih ekskurzija.

Član 2.

Ekskurzije se organiziraju u skladu sa nastavnim planom i programom i godišnjim programom odgojno-obrazovnog rada škole.

Član 3.

Na početku školske godine škola donosi detaljan plan ekskurzija koji je sastavni dio godišnjeg programa.

Član 4.

Ekskurzija je sastavi dio odgojno-obrazovnog rada.

Vrijeme provedeno na ekskurziji ubraja se u fond radnih dana, odnosno nastavnih sati.

Član 5.

Ekskurzije se mogu izvoditi u zemlji i inozemstvu.

Za učenike I i II razreda osnovne škole ekskurzije se organiziraju na teritoriji općine, za učenike III i IV razreda osnovne škole na teritoriji Unsko-sanskog kantona, a za učenike V-IX razreda na teritoriji Bosne i Hercegovine.

Član 6.

Izvođenje Ekskurzija odobrava nastavničko vijeće.

Član 7.

Ekskurzije imaju obrazovni, odgojni i zabavni cilj.

Obrazovni cilj ekskurzije je stjecanje novih znanja, produbljivanje i utvrđivanje građe obrađene na satima u školi i povezivanje teoretske nastave s praksom.

Odgojni cilj ekskurzije je razvijanje ljubavi prema Bosni i Hercegovini, upoznavanje prirodnih ljepota, kulturnih i historijskih spomenka i institucija naše zemlje, zbližavanje učenika, razvijanje prijateljstva među njima i socijalizacije.

Zabavni i kulturni karakter ekskurzija osigurava posjetama pozorišnim i filmskim predstavama, sportskim manifestacijama, organiziranjem sportskih i kulturna aktivnosti učenika, takmičenja, zabavnih večeri i sl.

Član 8.

Ekskurzije mogu biti poludnevne, jednodnevne i višednevne.

Poludnevne i jednodnevne ekskurzije prema utvrđenom planu, organizira razrednik ili razredno vijeće.

Cilj poludnevnih i jednodnevnih ekskurzija je obilazak kulturnih, historijskih i vjerskih spomenika i institucija, privredna organizacija, uspostavljanje suradnje s drugim školama.

Višednevne ekskurzije, prema utvrđenom planu, organizira nastavničko vijeće.

Trajanje višednevnih ekskurzija je 3 (tri) dana za učenike nižih razreda i 5 dana za maturalne ekskurzije učenika.

Član 9.

Prilikom obilježavanja državnih i vjerskih blagdana i značajnih datuma naše historije, škola može organizirati ekskurzije za sve učenike škole.

Član 10.

Najbolje odjeljenje po uspjehu i vladanju, škola može nagraditi posebnom jednodnevnom ekskurzijom.

Član 11.

Ekskurzija se sastoji od:

1. pripreme,
2. izvođenja,
3. analize.

Član 12.

Stručna priprema

U vezi sa strukturom i načinom rada postoji:

1. stručna priprema,
 2. tehnička priprema.
- 1) Stručna priprema počinje odmah po donošenju odluke o izvođenju ekskurzija.

Odluka o izvođenju ekskurzija obuhvata:

- a) vrijeme trajanje ekskurzije,
- b) imenovanje vođe puta i nastavnika učesnica ekskurzije,
- c) tačan plan ekskurzije,
- d) izbor turističke agencije izvršen u skladu sa zakonom (za višednevne ekskurzije je obavezno pribaviti najmanje tri ponude turističkih agencije koje uključuju prijevoz, smještaj i ishranu te osiguranje).

Razrednici i ostali nastavnici pružaju pomoć vođi puta radi što potpunije pripreme ekskurzije.

2) Tehničku pripremu za izvođenje ekskurzije vrši vođa puta uz pomoć razrednika i učenika.

Razrađen plan puta treba izložiti roditeljima ili starateljima na zajedničkom roditeljskom sastanku. Roditelji ili staratelji trebaju biti upoznati o materijalnim izdacima potrebnim za izvođenje ekskurzije.

Član 13.

Sve pripreme (stručne i tehničke) moraju biti završene najmanje 15 dana prije početka ekskurzije.

Razrednik je dužan upoznati učenice o njihovim obavezama za vrijeme trajanja ekskurzije (kulturno ponašanje, čuvanje imovine i sl.).

Član 14.

Ekskurzija je obavezna za sve učenike odjeljenja ili razreda za koje se organizira.

Član 15.

Izvođenje ekskurzije

Ekskurzija se može izvesti ako u njoj učestvuje najmanje 85% učenika za koje se organizira.

Srazmjerno broju učenika na ekskurziji, određuje se i broj pratilaca-nastavnika:

- jedan nastavnik: 10 - 20 učenika.

U toku ekskurzije nastavnik pratilac mora voditi brigu o učenicima kojima je određen za pratioca.

Član 16.

Ako je na ekskurziji dijete sa posebnim potrebama ili invalidno dijete, određuje se jedan nastavnik pratilac.

Član 17.

Za vrijeme trajanja ekskurzije učenici:

- a) se moraju pridržavati plana ekskurzije,
- b) ne smiju piti alkohol ili koristiti druga narkotička sredstva,
- c) moraju se odgovorno odnositi prema tuđoj imovini,
- d) ne smiju se izdvajati iz grupe bez dozvole,
- e) ne smiju kasniti na dogovoreno mjesto.

Član 18.

Ako u toku ekskurzije jedan učenik ili grupa učenika zakasni na dogovoreno mjesto za nastavak ekskurzije, jedan nastavnik će ih sačekati, dok će ostali učenici nastaviti po planu ekskurzije.

Član 19.

Ako jedan učenik ili grupa učenika napravi prekršaj iz člana 17. ovog Pravilnika i time ozbiljno ugrozi izvođenje ekskurzije, vođa puta može donijeti odluku da se učenici vrate kući.

Povratak učenika ili grupe učenika kući organizira vođa puta.

Član 20.

Ako učenik oboli za vrijeme ekskurzije ili se povrijedi, vođa puta mora osigurati liječnički pregled, a po potrebi i smještaj u bolnicu.

Član 21.

U slučaju većih problema prilikom izvođenja ekskurzija u inozemstvo, vođa puta se mora obratiti najbližem diplomatskom predstavništvu Bosne i Hercegovine

Član 22.

Prilikom planiranja ekskurzije škola mora voditi računa o njenoj cijeni, kako bi ekskurzija bila dostupna svim učenicima.

Član 23.

Učenici, učesnici ekskurzije sami snose troškove ekskurzije.

Član 24.

Učeničkom solidarnošću, sredstvima ostvarenim radom učeničke zadruge, donacijama i sl. treba omogućiti odlazak na ekskurziji učenicima čiji roditelji nisu u stanju snositi troškove ekskurzije, a posebno djeci šehida, poginulih boraca i invalida.

Član 25.

Analiza ekskurzije

Analiza ekskurzije obuhvata analizu stručnog i tehničkog dijela, te opći utisak i zaključak.

Pismenu analizu sačinjava vođa puta nastavničkom vijeću u roku od 15 dana od dana povratka.

Član 26.

Nastavničko vijeće razmatra izvještaj, daje mišljenje i donosi konačan izvještaj o izvedenoj ekskurziji.

Član 27.

Organ nadzora za izvođenje ekskurzije je nastavničko vijeće i direktor škole.

Njihov zadatak je osiguravanje i ispunjenje odgojno-obrazovnog cilja ekskurzije.

Član 28.

Škola mora imati sve potrebnu dokumentaciju o organiziranju i izvođenju ekskurzija.

Član 29.

O izvođenju ekskurzija, a na zahtjev Ministarstva obrazovanja, nauke, kulture i sporta, škola je dužna dostaviti svu potrebnu dokumentaciju.

Član 30.

Ovaj pravilnik se primjenjuje u umjetničkim školama, a do usvajanja zakona o srednjem stručnom obrazovanju u svim tehničkim i srodnim školama i srednjim stručnim školama.

Član 31.

Ovaj Pravilnik stupa na snagu danom objavljivanja u „Službenom glasniku USK“.

Broj: 10-02-5941-1/05

Bihać, 20. april 2005. god.

Za Ministra

Izolda Osmanagić, prof.